

史料旬刊

第二十三期

世說新語

卷之四

中華民國二十年一月十一日出版

史料旬刊第二十三期

編輯所 故宮博物院文獻館

發行所 神武門外發售室

印刷所 京華印書局



價目表		郵費	
每旬一冊	四角	外埠	每期一角
預定半年十八冊	六元五角	外國	每期二角
預定全年三十六冊	十二元	本院發寄刊物均交郵局掛號遞送以免遺失	

本市 商務印書館 中華書局

上海 文明書局 世界書局及

天津 其他各大書店均有代售

史料旬刊第二十三期目錄

趙雲鵬捏造圖記誑騙錢文案 原件藏三所

(一) 楊廷璋摺

(二) 富尼漢摺

(三) 彰 寶摺

(四) 海 明摺

(五) 良 卿摺

高樸私鬻玉石案 原件藏三所

(一) 薩 載摺四

(二) 寅 著摺二

(三) 勒爾謹摺七

(四) 畢 沅摺五

(五) 畢 沅摺六

(六) 巴延三摺七



(七) 舒 文摺四

(八) 楊 魁摺七

(九) 楊 魁摺八

(十) 巴延三摺八

(十一) 李承鄴摺三

(十二) 巴延三摺九

(十三) 高 晉摺二

內務府成造物品案 原件藏三所

(一) 內務府摺

(二) 三
英 和 摺
廉

(三) 三 和摺

(四) 內務府摺二

緬匪進貢還人案 原件藏三所

(一) 裴宗錫摺

(一) 裴宗錫摺二

(二) 海 祿摺

(四) 裴宗錫摺三

(五) 海 祿摺二

(六) 裴宗錫摺四

道光朝外洋通商案 原件藏三所

(一) 盧 坤 墳摺

(二) 盧 坤等片

(三) 哈豐阿等摺

(四) 昇 寅等片

彙核嘉慶十七年各直省錢糧出入清單 原件藏三所 (二續)

地丁項下

(一) 福建省

(二) 湖北省

(三) 湖南省

趙雲鵬捏造圖記誑騙錢文案

楊廷璋摺

直隸總督臣楊廷璋謹奏爲查明據實覆奏事竊臣於十月二十九日承准大學士公傳恒大學士尹繼善字寄內開乾隆三十三年十月二十七日奉上諭刑部審擬捏造圖記誑騙錢文之趙雲鵬一摺已照部議完結至摺內有直隸文安縣民李仰尼圖免本地差役謀求執照一節殊屬可異現在各省地方丁賦皆有定籍凡遇公事絲毫不以累民並無撥派徭役之事即以雲南進勦緬匪而論京兵所過雖不無稍資民力尙且官爲給值此外復有何事必須驅役平民況李仰尼籍隸文安並非驛路經由之地與兵差更無干涉今李仰尼肯出私錢圖免差役必係該地方官有藉端擾累情事其所關於民生吏治甚大不可不澈底跟究著楊廷璋詳悉查明覆奏並查通省情形據實奏聞毋得稍存隱飾所有案內未到之劉大小子一犯著富明安速緝解部並交鄂寶於到任後遍行查明具奏至各省或尙有因公差派名色及不肖有司借名抑勒閭閻之處並著傳諭各該督撫一體實力查察將實在情形若何詳悉具摺奏聞

欽此臣伏查借差擾民所關甚大李仰尼平日所當何差必得親訊方知確實隨即飭司提解並確查通省情形去後茲據將李仰尼提到臣率同兩司親加研審據供在本縣承應差役係每年修理民埝民隄并交冬守柵支更此係民間各自保護本地莊舍田禾原不想求免祇緣在京賣簾與趙雲鵬買簾相識因其詢問在籍有何差役故而言及又因其聲言給照可以免差故向求取後經趙雲鵬持照索銀李仰尼即行退悔答以無銀而趙雲鵬即聲言如不給銀必貽禍害是以三次付與錢布荷包其實照未取回在縣亦無另有別差地方官並無借差擾累情事等語臣查歲修民埝民隄以及各村莊於冬月守柵支更等事皆民間自衛田廬且俱係農隙時公衆辦理之事李仰尼賣簾營生即欲優免亦何肯出錢五千布十匹之多其間必尙有別項擾累情事又經詳細研審并明白開導令其實供據稱向趙雲鵬要照時實未許其酬謝若干後因趙雲鵬嚇逼再三鄉愚無奈只得陸續應付如果另有擾累差徭則以得照爲重豈肯已給錢布又不取照而回今奉澈底根訊尙有別差正好供出求免又豈肯代爲隱諱等語反覆究詰矢供如一似無遁情據布政使觀音保按察使

周元理詳覆地方丁賦原有定籍而一州一縣不無差役如地方河道隄工除帑工之外一切民埏民溝俱應歲修村莊守柵支更皆用民力或有過往餉鞘除派撥兵役看守外亦得撥夫支更故紳衿有優免之例年七十以上亦許一丁侍養免其差徭至直隸辦理一切差務皆蒙皇恩發帑並無絲毫累民卽如需用車馬俱係按日給價大小工程照例開銷或以工代賑無不動支帑項地方官實無藉差擾累情事惟歲修民埏民隄及疏濬田疇水利溝渠並支更守柵等事向係民自爲計然亦照例均派並無偏枯通省情形大率相同等情呈請覆奏前來臣復加諮訪無異但直隸州縣甚多牧令賢愚不一臣仍當督同司道留心察訪倘不肖有司敢有派擾閭閻之事卽行嚴加參處斷不敢因現在查無其事稍疎覺察致累小民上負德意爲此恭摺具奏伏乞皇上聖鑒訓示遵行謹奏乾隆三十三年十一月二十一日硃批該部知道

富尼漢摺

山東巡撫臣富尼漢跪奏爲遵旨詳悉具奏事本年十一月初九日臣在掖縣

途次承准大學士公傳恒大學士尹繼善字寄內開乾隆三十三年十月二十七日奉上諭刑部審擬捏造圖記誣騙錢文之趙雲鵬一摺已照部議完結云云（中略見前）欽此遵旨寄信到臣經臣欽遵轉行藩臬兩司查覆去後茲據該司等行據濟南等府查明詳覆前來臣查勒派差徭久奉例禁我朝自丁糧歸於地畝一切徭役絲毫不以累民是古所稱力役之征今已並無其事東省爲南北衝衢凡遇差使往來需用車船運載各按時給值從無累及民間卽如臣前在臬司任內恭遇鑾輅南巡所用車輛船隻無不動支官項按程計日給予腳價並計其守候回空格外優恤小民踴躍奉公毫無苦累此其明驗今春臣蒙聖恩調任山左惟恐屬吏賢愚不一於修建城垣挑築河渠等項鳩工運料均需車畜人夫或有抑勒派累及短價侵扣情弊密與兩司留心稽察悉皆按例發價並無差派擾累之事除欽遵聖諭隨時實力查察倘有因公差派名色及借名抑勒閭閻之處臣當嚴參究治斷不敢稍存隱飾所有東省現在情形理合遵旨恭摺覆奏伏乞皇上睿鑒謹奏乾隆三十三年十一月二十七日硃批知道了

彰寶摺

江蘇巡撫臣彰寶謹奏爲遵旨查察實在情形詳悉覆奏事竊臣准督臣高晉抄送乾隆三十三年十一月初八日接到大學士公臣傅恒大學士臣尹繼善字寄乾隆三十三年十月二十七日奉上諭刑部審擬捏造圖記誣騙錢文之趙雲鵬一摺已照部議完結云云（中略見前）欽此欽遵臣查江蘇地方丁銀向隨田辦孳生戶口永不加賦歷來並無徭役各州縣按額催科除例應輸將之項此外絲毫不敢累民凡遇一切公事須用人夫匠役及車船馱載者悉係給值雇募從不資用民力擾及閭閻亦未聞有圖免差役求給執照之事茲奉諭旨垂詢誠恐各屬尙有流弊未盡革除或不肖有司借名抑勒及經胥里保私行科斂等事隨飭江寧蘇州兩藩司會同按察司嚴行查察去後茲據蘇州布政使胡文伯署江寧布政司江安糧道姚成烈按察使吳壇會詳稱各屬衝途有驛州縣遇勘合火牌及撥護餉鞘等項俱有額設夫船照例支給應付其餘過往差使例不給驛者俱係各員役自行給價雇用地方官既不經手津貼

更與閭閻無擾至州縣自有本處公務如興建工程多係動帑修理所需夫工料物俱應照估給發每屆購料興工之時道府逐層查察近來承辦各員凜遵功令不敢尅扣短少鋪戶居民亦不肯甘受勒派間有橋梁道路些小殘缺該地紳耆自願捐貲粘補者地方官勘明據情詳報聽民自爲經理事竣酌量嘉獎惟農田水利係民間切己要務或支河應行開濬圩岸應行加培溝洫應行疏通皆爲旱澇蓄積所關向例冬晴水涸責令業主出食佃戶出力各分段聽民自相爲謀地方官督察查催於工竣報驗循行已久輿情稱便近年蘇松常鎮等屬如三江水利福山塘河等處工大費繁因民力未能一時興舉奏請借帑挑浚按田驗派分年完納又太倉州屬嘉定寶山二縣河道潮灌易淤有編定河夫錢文歲加疏浚皆俯順民情於田疇實多裨益再查蘇松各屬民間地保向係百姓公舉充膺其有頂帶之生監人等恐伊恃符武斷不准舉報充當至於支更守宿係民間守望相助之義雖紳戶齊民一體自相輪值均非官爲派差稍有抑勒之事等情稟覆前來臣復細加查察俱係江蘇實在情形委無因公差派名色以致民間畏避役使給照求免等弊惟是地方官與民最親

賢愚不一倘有劣員借公事爲名求索科斂及短給價值濫差擾累等項弊端現在隨時覺察惟有據實嚴參以肅吏治斷不敢稍存姑息致累閭閻所有查明實在情形謹會同督臣高晉合詞恭摺覆奏伏乞皇上聖鑒訓示謹奏乾隆三十三年十一月三十日硃批知道了

海明摺

護理四川總督印務布政使奴才海明謹奏爲遵旨查明據實奏聞事竊奴才承准大學士公傳恒大學士尹繼善遵旨寄信內開乾隆三十三年十月二十七日奉上諭刑部審擬捏造圖記誑騙錢文之趙雲鵬一摺已照部議完結云云（中略見前）欽此仰見皇上肅清吏治加惠黎元之至意奴才荷蒙天恩擢用藩司現護督篆所屬地方事有累及在民即當力爲釐剔竭盡犬馬微忱豈敢稍事因循自蹈欺隱但查川省地處邊隅差役本少向來有驛州縣遇有差務或需用民夫或添僱里馬均係照例按日給價其餘各州縣民凡有應辦公事俱准照例報銷地方官本無賠累自無從藉口因公致滋擾派即如上年及

本年協濟滇省軍需所有兵馬經過地方不無稍資民力然一切俱係按數給值令地方官先行具領轉發報查且屢經督臣阿爾泰加意訓飭逐一查察復令奴才及臬司各道一體嚴行密訪務期弊絕民安在閭閻本無所累况復荷恩綸下沛將本年應納錢糧俱緩徵輸皇恩益加厚民情愈見踴躍現在各地方官並無因公差派借名抑勒情事茲奉諭旨飭查奴才惟有恪遵聖訓不時實力稽查設有不肖州縣假托公事濫行科派奴才立即嚴參究治斷不敢代爲徇隱上負聖恩所有川省查無藉差累民實在情形理合恭摺詳悉具奏伏乞皇上睿鑒謹奏乾隆三十三年十一月三十日硃批知道了

良卿摺

貴州巡撫革職留任臣良卿謹奏爲遵旨查明實在情形據實覆奏事乾隆三十三年十一月二十四日承准大學士公傅恒等字寄內開十月二十七日奉上諭刑部審擬捏造圖記誣騙錢文之趙雲鵬一摺已照部議完結云云（中略見前）欽此欽遵到黔臣卽行司轉飭各府確查詳報去後茲據布政使張

逢堯按察使高積詳據貴陽安順南籠平越都勻鎮遠思州等七府覆稱府屬地當驛路各廳州縣承應京兵過境需用夫馬不無稍資民力均係按日給發雇價又蒙皇恩加賞咸霑優恤至驛站平時應付差使俱用額設站夫設遇餉鞘數多額夫不敷添雇民夫檣送向照定例給價報銷此外並無因公差派擾累閭閻之處又據大定遵義思南石阡銅仁黎平等六府覆稱府屬各州縣地處偏僻本無差徭上今兩年採買軍需馬牛及協雇牲畜赴站應差均發價值此外實無科派差使藉名抑勒之事等情詳覆前來臣細加查察黔省民苗雜處易滋擾累一應差徭久奉禁革歷經申令綦嚴官吏尙知遵守別無公私事務役使平民卽如上今兩年籌夫辦馬俱係奏明給價稍有辦理不善如正安綏陽等處臣卽據實參究不惟僻路州縣平日本無差使卽地處衝衢偶一添用扛鞘人夫莫不例給雇價委無另有因公差派名目致啓抑勒滋擾之弊理合查明實在情形詳晰覆奏伏乞皇上睿鑒此後惟有督同司道嚴飭各屬遵守章程俾小民各安生業臣仍不時稽察如有不肖有司藉公差派貽累閭閻者卽當隨時參處斷不敢姑容滋弊合併陳明謹奏乾隆三十三年十二月十

九日硃批知道了